

1 Nua duess jau deponer la tschendra?

2 Nus essan puspè ina giada en viadi per ir enta Ramoz. Noss satgados èn grevs, e nus
3 essan gia trais uras sin via, e realisain adina dapli, co che la chargia ans strocla. La senda
4 tras il „Welschtobel“ ans maina per lung da l'auai enfin al „Sandböden“ dadens. Là
5 faschain nus ina pausa. Quest mument che nus vulain ans tschentar, vegni endament a
6 mia dunna la platta da chadafieu. Ella n'era betg segira, sch'ella l'haja stidada, suenter
7 che ella aveva fatg il té. Mia reacziun n'è betg gist stada amicabla. Sco pumpier
8 enconusch jau il privel da plattas ardentas. Ed jau fatsch quitads. Ma tge duess jau far?
9 Duess jau turnar a chasa per guardar che tut saja en urden? Quai na fa nagin senn. Sche
10 la chadafieu arda, sche arriv jau tuttina memia tard per far insatge. Nus ans decidain dad
11 ir vinavant.

12 Ina mes'ura pli tard vesain nus in viandant che vegn encunter. Jau hai l'intenziun da
13 trametter cun quel ina comunicaziun per Hans Caspar, noss vischin. Quel ha ina clav
14 per nossa chasa ed è franc pront da guardar, sche la platta è stidada u betg. Cura che nus
15 scuntrain noss alpinist, faschain nus puspè ina experientscha malempernaivla. El
16 discorra mo anglais! Jau hai anc mai dà fadia d'emprender questa lingua che ma dat sin
17 la gnerva. Ussa però fiss jau cuntent, sche jau savess in pèr plets. Da tut quai ch'el ans di,
18 chapin nus mo «Valsana». Pli probabel è l'Anglais giast da l'hotel Valsana. Il directur da
19 quel è in bun enconuschent da mai. «A quel pudess l'Anglais purtar in pèr lingias cun il
20 giavisch da telefonar a Hans Caspar e da l'orientar dal cuntegn da nossa notizia», ma vai
21 tras il chau. In'idea grondiusa! La situaziun è salvada.

22 Ma danunder duess jau prender in rispli ed in toc palpieri? En il satgados na chattain nus
23 nagut. Cura che nus avain pachetà quai che nus duvrain per quatter emnas, avain nus
24 pensà a tut quai che po capitar. Ma betg al material da scriver. En situaziuns criticas
25 chatta mia dunna adina ina soluziun. Dad ella poss jau ma fidar. Era ussa chatta ella l'ov
26 da Columbus. Cun il lefzagl scriva ella la comunicaziun sin in faziel da nas da palpieri.
27 L'Anglais na fa betg mucs. El guarda tge che mia dunna fa, cun ina tschera, sco sche quai
28 fiss per el il paun da mintgadi. El metta il fegl en giaglioffa e di adia, naturalmain per
29 anglais.

30 Jau passent ina lunga notg. Sin far di ma met jau en viadi cun mes chaun Molly vers il
31 «Erzhornsattel». Il sulegl e nus dus arrivain ensemen sin il fil. Da la cresta davent poss

- 32 jau survesair l'entira vischnanca d'Arosa. Cun il perspectiv guard jau giu sin nossa chasa.
33 Ella stat anc adina. Dal plaschair vuless jau dar in givel. Ma quai na fatsch jau betg,
34 perquai che jau na vi betg disturbar il paus da la damaun.
- 35 La saira vegn Hans Caspar nunspetgadamain en tar nus en chamona. Ch'el saja mo vegnì
36 per s'infurmar, nua ch'el duaja metter la tschendra da la chasa, di el riend.
37 I na dat nagut meglier ch'in bun vischin.

(Da : Martin Raschèr, Ova da savun/Seifenwasser. Istorgias cuortas/Kurzgeschichten. Cuir, 2012)